

Samþykkt um kjör fulltrúa í stjórnnum, ráðum og nefndum Vesturbyggðar.

I. kafli Inngangur

1. gr Um starfskjör

Samþykkt þessi byggir á *Samþykktum um stjórn Vesturbyggðar*. Samþykktin fjallar um þóknun fyrir störf sveitarstjórnarmanna og nær einnig til starfa þeirra fulltrúa sem skipaðir eru af sveitarstjórn í stjórnir, ráð og nefndir á vegum sveitarfélagsins.

2. gr Markmið

Markmið með ákvörðun um kjör fulltrúa er:

- Að fulltrúar fái sanngjörn laun fyrir störf sín í þágu sveitarfélagsins.
- Að fulltrúar sveitarfélagsins njóti kjara sem eru sambærileg við það sem gerist á hinum almenna vinnumarkaði, sambærilegum sveitarfélögum og ríkinu.
- Að kjör fulltrúa séu gagnsæ og endurspegli störf þeirra og ábyrgð.

3. gr Skilgreiningar

Sveitarstjórnarfulltrúar eru sjö og kjörnir í almennum sveitarstjórnarkosningum. Nefndum sveitarfélagsins er skipt niður í eftirfarandi flokka :

- Sveitarstjórn
- Fastanefndir
- Aðrar nefndir, stjórnir og ráð
- Sérskipaðar nefndir (verkefnabundnar nefndir) sveitarstjórnar og fundasetur sem falla ekki undir liði A-C.

Almenn skilgreining á fundi er sú að til hans sé boðað með dagskrá og um hann sé rituð fundargerð.

II. kafli Um starfskjör sveitarstjórnarfulltrúa.

4. gr Grunnlaun sveitarstjórnarfulltrúa

Sveitarstjórnarfulltrúar þiggja föst laun á mánuði fyrir störf sín fyrir sveitarfélagið sem nemur 6% af þingfararkaupi, eins og það er hverju sinni. Forseti bæjarstjórnar fær að auki föst laun á mánuði sem nemur 10% af þingfararkaupi. Formaður bæjarráðs fær að auki föst laun á mánuði sem nemur 6% af þingfararkaupi og aðrir fastafulltrúar í bæjarráði fá greidd 2% á mánuði. Þessar greiðslur ná til vinnu vegna sveitarstjórnarmála almennt.

5. gr

Fundarseta

Fulltrúar í sveitarstjórn fá að auki greitt sérstaklega fyrir hvern setinn fund í sveitarstjórn sem nemur 3% af þingfararkaupi. Varamenn sem taka sæti aðalmanns í sveitarstjórn fá greitt sem nemur 3% af þingfararkaupi fyrir hvern setinn fund. Ritari bæjarstjórnar fær greitt fyrir hvern setinn fund í sveitarstjórn sem nemur 3% af þingfararkaupi.

6. gr

Starfsaðstaða sveitarstjórnarfulltrúa, símakostnaður

Sveitarstjórnarfulltrúar fá sameiginlega skrifstofuáðstöðu á skrifstofu sveitarfélagsins með aðgangi að tölvu, síma og prentun. Skrifstofan annast skrifstofuþjónustu fyrir sveitarstjórnarfulltrúa svo sem gagnaöflun, símvörslu, ritvinnslu og undirbúning funda.

Sveitarstjórnarfulltrúar fá greiddan símakostnað 2.500 kr. á mánuði, formaður bæjarráðs og varaforseti bæjarstjórnar fá 5.000 kr. á mánuði og forseti bæjarstjórnar 7.000 kr. á mánuði.

7. gr

Laun í orlofi

Sveitarstjórnarfulltrúar skulu fá greidd laun á meðan sumarleyfi sveitarstjórnar stendur.

8. gr

Lífeyrisréttindi og tryggingar

Vesturbyggð heldur eftir iðgjaldi í lífeyrissjóð af launum sveitarstjórnarfulltrúa skv. ákvæðum laga um skyldutryggingu lífeyrisréttinda og starfsemi lífeyrissjóða nr. 129/1997. Greitt er iðgjald í lífeyrissjóð og er mótframlag sveitarfélagsins 12%.

Sveitarstjórnarfulltrúar eru tryggðir gegn slysum í starfi skv. heildartryggingarsamningi sveitarfélagsins.

9. gr

Laun í veikinda- og slysaforföllum

Sé sveitarstjórnarfulltrúi forfallaður frá störfum vegna slyss eða veikinda heldur hann launum sínum í allt að 6 mánuði. Greiðslur skv. 1. mgr. falla niður við lok kjörtímabils eða þegar sveitarstjórnarfulltrúi lætur af störfum af öðrum ástæðum.

III. kafli

Þóknun fyrir nefndarstörf

10. gr

Þóknun fyrir setu í fastanefndum, skv. 3. gr. B- og C-lið

Fyrir hvern setinn fund í bæjarráði er greidd þóknun sem nemur 3% af þingfararkaupi. Fyrir hvern setinn fund fá aðalmenn í fastanefndum samkvæmt skilgreiningu um „Nefnd I“ greidda þóknun sem nemur 2% af þingfararkaupi og formenn nefnda 3%. Fyrir hvern setinn fund fá aðalmenn í fastanefndum samkvæmt skilgreiningu um „Nefnd II“ greidda þóknun sem nemur 3% af þingfararkaupi og formenn nefnda 4%. Varamenn í fastanefndum fá greidda þóknun sem nemur 2% (Nefnd I) og 3% (Nefnd II) af þingfararkaupi fyrir hvern setinn fund.

Fastar nefndir sveitarfélagsins eru:

Bæjarráð.

Nefnd I: Almannaþingarnefnd, atvinnu- og menningarráð, barnaverndarnefnd, fjallskilanevnd, fræðslu- og æskulýðsráð, hafnarstjórn, ungmennaráð, velferðarráð, aðrar nefndir.

Nefnd II: Skipulags- og umhverfisráð, samráðsnefnd Vesturbyggðar og Tálknafjarðarhrepps. Starfsfólk sveitarfélagsins fær ekki greidda sérstaka þóknun fyrir setu á nefndarfundum nema viðkomandi sitji fund sem kjörinn fulltrúi.

11. gr

Þóknun vegna starfa í sérstökum nefndum er vinna að einstökum afmörkuðum verkefnum og vegna sérstakra funda, skv. 3. gr D-liður

Fyrir störf í sérstökum nefndum sem sveitarfélagið skipar til tímabundinna starfa fá fulltrúar greitt sem nemur 2% af þingfararkaupi fyrir hvern fund, en formenn þeirra fá greitt 3%.

12. gr

Þóknun vegna funda og ráðstefna utan sveitarfélags

Fyrir þátttöku á ráðstefnum og fundum utan sveitarfélags, sem sveitarstjórn ákveður að taka þátt í, er greitt þóknun til kjörinna fulltrúa sveitarfélagsins fyrir hvern dag sem nemur 2% af þingfararkaupi.

13. gr

Þóknun fyrir setu í nefndum, ráðum og stjórnnum á vettvangi samstarfs sveitarfélaga, skv. 3. gr. D-liður.

Þóknun fyrir setu í nefndum og stjórnnum á vettvangi samstarfs sveitarfélaga er greidd af viðkomandi samtökum, nema um annað sé samið sérstaklega, sbr. þó skilgreiningu samkvæmt „Nefnd II“ í 10. gr.

14. gr

Laun kjörstjórnar

Fyrir setu í kjörstjórn er greitt skv. tímagjaldi fyrir unnar klukkustundir og skal miðað við kjarasamning Sambands íslenskra sveitarfélaga og Samflot bæjarstarfsmanna, lfl. 125.

Kjörstjórn fær greitt fyrir undirbúning, vinnu á kjördag og frágang að kosningum loknum.

IV. kafli

Önnur ákvæði

15. gr

Álag vegna sérstakra frídaga og stórhátíðardaga

Leitast skal við að nefndir, ráð og stjórnir fundi ekki á frídögum og stórhátíðardögum. Í undantekningartilfellum getur komið fyrir að nefnd, ráð eða stjórn neyðist til að halda fund á sérstökum frídegi og skal þá greiðast álag skv. eftirfarandi :

- Sérstakir frídagar 33% álag á laun fyrir setinn fund.
- Stórhátíðardagar 45% álag á laun fyrir setinn fund.

16. gr

Um námskeið og þekkingarsókn

Æskilegt er að kjörnir fulltrúa sækji sí- og endurmenntun er tengist störfum þeirra fyrir sveitarfélagið. Leita þarf samþykkis sveitarstjórnar vegna kostnaðar sveitarfélagsins sem hlýst af námskeiðssókn kjörinna fulltrúa, falli kostnaður utan fjárhagsáætlunar. Sækja skal um til sveitarstjórnar með góðum fyrirvara og samþykki liggja fyrir áður en til útgjaldanna er stofnað.

17. gr
Um orlof

Orlof er ekki greitt á laun fulltrúa í nefndum, ráðum og stjórnnum sveitarfélagsins.

18. gr
Um ferðir og gistingu

Sveitarstjórnarmenn eiga rétt á greiðslu ferða- og dvalarkostnaðar, sbr. 32. gr. sveitarstjórnarlaga nr. 138/2011.

Akstur vegna starfa í þágu sveitarfélagsins er einungis greiddur eftir akstursdagbók eða reikningi. Fulltrúar fá greiddan akstur til og frá fundarstað utan sveitarfélagsins í hverjum mánuði og miðast greiðslur á ekinn km. við ákvörðun ríkisskattstjóra um aksturskostnað eða sérstaka eingreiðslu fyrir ferðina (í desember 2014 var eingreiðslan 30.000 kr.) samkvæmt fjárhagsáætlun hverju sinni. Ætíð skal leitast við að ferðast á sem hagkvæmastan hátt, t.d. nýta ökutæki sveitarfélagsins eða samnýta ferðakosti ef mögulegt er. Greiða skal gisti- og fæðiskostnað með dagpeningum í þeim tilfellum sem sveitarfélagið sér fulltrúa ekki fyrir fæði og gistingu. Greitt er eftir ákvörðun ríkisskattstjóra um ferðakostnað á hverjum tíma. Um ferðir erlendis gildir hið sama en fulltrúar skulu fá samþykki sveitarstjórnar fyrir öllum slíkum ferðum og útgjöldum fyrirfram.

19. gr
Tilfallandi tímavinna

Í undantekningartilfellum getur komið til þess að fulltrúi sveitarfélagsins þurfi að takast á hendur aukin verkefni út yfir venjubundna vinnu í kringum fundi. Í þeim tilvikum skal gerð um það áætlun fyrirfram og hún borin undir sveitarstjórn.

V. kafli
Gildistaka og endurskoðun

20. gr
Gildistaka og endurskoðun

Samþykkt þessi gildir frá 1. janúar 2015 og falla um leið úr gildi eldri reglur um kaup og kjör fulltrúa í stjórnnum, ráðum og nefndum sveitarfélagsins. Samþykktir þessar skal endurskoða af sveitarstjórn við gerð fjárhagsáætlunar ár hvert.

Bæjarstjórn Vesturbyggðar
2. desember 2014.